

CAROLVS Quintus Diuina fauente clementia Romanorum Imperator semper Augustus, ac Germaniæ Hispaniarū, utriusq; Siciliae, Hierusalem, Hungariæ, Dalmatiæ, Croatiae, &c. Rex, Archidux Austriae, Dux Burgundiae, Brabantiae, &c. Comes Habsburgi, Flandriæ, Tyrolis &c. Vniuersis & singulis notum esse uolumus. Quum noster & Imperij sacri fidelis, dilectus Petrus Apianus Mathematicæ rei in primis peritus, nobis humilime supplicauerit, quòd Ephemerides quasdam, unà cum alijs infra commemoratis opusculis, maximo suo sumptu, pariq; tum inuentionis tum æditionis labore, in cõmunem bonorum studiosorumq; omnium usum candide & humaniter ædere secum cõstituerit, Vereaturq; iam ne eadem ab alijs quoq; qui ex alterius incommodo suum aucupari contendunt commodum, quicq; alieno labore bene parta, in suum ipsorum male conuertunt usum, imprimerentur, id quod in suum haud uulgare detrimentum redundaret, quatenus Priuilegij nostri prærogatiua ad certum annorum numerum, in quo nemo planè illud tentare auderet, se adiuuare dignaremur. Quumq; nos eorū, qui tum opera diligenti ac sedula, tum uigilantia sua non mediocri, quam & prouehendis bonis artibus gnauiter impendunt, & inuulgandis utilibus libris nulli nec sumptui parcentes nec labori, liberaliter infumant, Reipub. insigniter prodesse solent, emolumentum promouere, contra dispendium amouere, pro germano & innato nobis ad eximia honestissimaq; ingenuarum artium studia fauore studeamus, sit ut facilius Apiano quoq; prædicto, precibus eiusdem & supplici petitioni cõdescendentes, Gratiã nostram hac in re impertiamus singularem. Omnibus itaq; & singulis Chalcographis, Bibliopoli, & quibusuis alijs tenore præsentium districtè inhibemus, ne uidelicet infra scriptos libros, quos præ nominatus Apianus uel iã æditioni destinauit, uel æditurus, eruditis oĩbus in publicum cõmunicatus est unq; puta Ephemerides ab anno salutis nostræ Millesimo quingentesimo tricesimo quarto ad Septuagesimum supra Millesimum & quingentesimum duraturas, præterea libros de Umbris, Centiloquium Arithmetices: & alium adhuc de Arithmetica libellum, cum Regulis Cosmæ demonstratis: De mensuratione uasorum cum artificiali partis uacuae inuentione: Schedulas diarias siue Almanac cum iudicijs annalibus, seu (ut uulgus loquitur) Practicis, quibus aeris mutationes, dierumq; electiones singulae continentur: Libros item de coniunctionibus: Ptolemæum ex nouissima illa Vuilibaldi Pyrckameri translatione, ante hac nunquam æditum, cū Tabulis correctissimis, & in quadrangularem figuram (cuiusmodi hæcenus excusæ non sunt) conformatis: Ptolemæi etiam libros Græce, eruditos eos sanè, & (quod tanto authore dignissimum erat) elegantes, natiuamq; illam suam gratiam in propria lingua retinentes: Librum de Eclipsibus: Librum Azophi Astrologi uetustissimi: Libros Gebri: VITELLIONIS quoq; authoris antiquissimi simul ac doctissimi Perspectiuam, opus & ingens & ipsa materiæ iucunditate laudatissimū: Astronomicū Imperatorium: Librum de diebus Creticis: Libros de Iride: Tabulas resolutas iam per eundem recens supputatas: Radium nouum Astronomicum, simulq; & Geometricum, unà cum uario Sinuum & Chordarum usu: Librum de Speculo ad pulcherrimas dimensiones apte accommodato: Introductionem Cosmographicam cū omnis generis obseruationibus itidem per sinus & chordas, adiuncto insuper Meteoroscopio duplici, plano & (quod inauditum erit plerisq;) numerorum, Astrolabiumq; numerorū uniuersale, ut recens ita utilissimum: Tabulas seu Mappas, ut uocant, uniuersi terrarum orbis generales, aut etiam quarundã Regionum seu Prouinciarum particulares: & quicquid in Mathematicis rebus dictus Apianus sub Titulo & nomine suo, aut si qua aliena rerum Mathematicarū monumenta prius neutiquam excusa, sua uero iam industria recognita & restaurata, uel etiam figuris tantum illustrata, per quoscunq; uolet Impressores, in lucem ædiderit, intra spacium triginta annorum, ab ipso æditionis die computando, præter suam ipsius uoluntatem, excudant, seu excudere faciant, neq; sic excusos uenum exponant seu uendant, sub poena Decem Marcharum Auri puri, pro una Camera nostræ Imperiali, altera uero medietate dicto Apiano irremissibiliter exoluendarum, tum amissionis librorum sic ad æmulationem excusorum, quos ubicunq; locorum nactus fuerit, per se siue suos, aut adiumento Magistratus eius loci, sibi uendicare & in potestatem suam redigere poterit. Harum testimonio literarum Sigilli nostri appensione munitarum. Datum in Ciuitate nostra Imperiali Ratispona, die tertia Mensis Iulij, Anno Domini Millesimo Quingentesimo Tricesimo secundo, Imperij nostri Duodecimo, & aliorum Regnorum nostrorum Decimo septimo.

Sächsische
Landesbibliothek
Dresden